

SUDAC

1. Evo mene ljudi mili

Veseli i zdravi bili
Obavezaj ovo vela
Veli blagdan našeg sela

Od Barbare do Slipice
Z vrh Straži do Japnenice
Zapivaju naša usta
Kad je vrime Mesopusta

Rojen san da ovo volin
Pačat va to ne dozvolin
Od tri kralja ča su sveta
Meni pamet već ne smeta

Sav se dajen v šentenciju
Da očuvan tradiciju
Celo telo nima mira
Kad parade selon svira

Obaveze se ostavljan
Od srca Vas sih pozdravljan
Od uvik je to po redu
Da pozdravi prvo gredu

Ki ste tu a ki na maši
Ki išćete spas va čaši
Ki ste tuji ki ste naši
Benzinci i dizelaši

Prolaze nan mili ljudi
S Mesopuston dani ljudi
Običaj se zato bati
Da niki na kraju plati

Moje pero će presudit
A sablja grkljan odrubit
Dok je vrime još gren valje
Pozrdavit ki žive dalje

Ne smin zabit dico moja
Nadu, Njegu i Hrvoja
Vrnite se jednog dana
Doma čeka tetac Frana

2. Rosu pozdrav va Afriki

I Bjelajcu va Meriki
Rosovo smo vino pili
Lipo redon I čistili.

Od srca mu fala velo
Ščekuje te tvoje selo
Pusa Kati v Opatiji
Celoj njenoj familiji

Ostali bimo bez gaže
Da nan ona ne pomaže
Njena firma našaj dika
Uprav slavi kvarat vika

Va Sidneji pozdrav Miki
Od ovud mu šaljen sliki
Od mala mu znadu dica
Čaj Hrvacka trobojnica

Va Zagrebi glavnon gradi
Pozdrav celoj našoj vladi
„NASLJEDNIKU“ premijeru
Lipu dugu karijeru

Mor nij on od čaći sinac
Da ga čeka Remetinac
Pozdrav još z mesta ovoga
Za ministra kij z Novoga

Precjednici isto tako
Ka Meriku skoči lahko
Nek se drži svoga kraja
I Jakovu češka jaja

TAMBUR

SUDAC

Od vas išćen sad dozvolu
Da krenen po protokolu
Bomej tužba fanj velika
Za našega „NASLJEDNIKA“

3. Prija nego počnen čitat
Abukata oću pitat
Dal se sića kako lani
Nij mogal ni da ga brani

Nalel sej na svoju ruku
Osramotil celu struku
Nij mogla pročitat blenta
Ni slova od testamenta

Nen ti pružit svoju ruku
Dok se ne izvineš puku
Bil si lani neobrijan
I ko tele ovdi pijan

Toj videlo celo selo
A plaćaju te debelo
Da obraniš toga gada
I Udruga i parada

Ne bin dalje se prepiral
Ja san ovo doktoriral
Dobit ću te do kraj dana
Ja i trezna i pijana

TAMBUR

ABUKAT

Kako se ov sudac vlada
Meni se baš ne dopada
Ja se sićan lanjske zgodi
Sakomu se to dogodi

Previše mej bilo zelo
A gljedalaj celo selo
Od vas išćen oprošćenje
Vrnite mi povjerenje

Mesopuste gren te branit
Ov put neću te sahranit
Pregljedal san celi spisi
I utvrdil da kriv nisi

Napadaš ga bez povoda
Ča te nij sram od naroda
Nisan ni ja veslo sisal
Pišan na to ča si pisal

4. Obranu dok ne sastavin
Red je da vas sih pozdravin
Si živimo za vo skupa
Se dokli nan srce lupa

Pozdravljan si općinari
Zač je zabil jarac stari
Završilaj jedna era
Koti daj to bilo čera

Simi nan je grdo bilo
Jer sej grdo dogodilo
Voleli su tog čovika
Z Bribira do Drivenika

Rič je va grkljani stala
Još jednuč mu velo fala
Zauvik te ostat slici
Molin tambur bez muziki

TAMBUR

SUDAC

Lipo si se tu poklopil
I vodicun se poškropil
Molin da se to uvaži
Pak oću bit zeru blaži

„NASLJEDNIKU“ gremo sudit
Oprosta mu nen ponudit
Niki mora rešit gada
Zato ča Bribir propada

Suza ti se v oki muti
Kad pogljedaš naši puti
Već trejset let problem isti
Nij dva metra lipe cisti

A ki Bože projektira
Nove cisti duž Bribira
Misli čovik ima nade
Kad se novi asvalt klade

A onda ta cista dura
Samo dokli puše bura
Kad tri dani kiša zлива
Teče cista kodaj živa

5. Va Zagriži ajme meni
Mesto cisti su bazeni
Od Vrbi do dna Kičera
Kot I Plitvička jezera

Za Škodići nen da čujen
Zdolu greš ako si munjen
Dva tri metra gori doli
To auto saki voli

Kosavini prije Šeti
Smiluj nan se Bože sveti
Totu nova magistrala
Misek dani nij durala

Ne išćen mu kaznu blažu
Kij bil majstor za drenažu
Dal ki zato odgovara
Boljaj bila cista stara

Neću se za kletu grozit
Oćemol se tuda vozit
Moglo bi se trefit koda
Da ju skroz odnese voda

TAMBUR

ABUKAT

Ti rešenja ni ne nudiš
Neg va prazno palamudiš
Ne išći va jaji dlaku
Kad si zadnju videl tlaku

Nij propusta ni konala
Kud bi voda otakala
Blagi Bože budi s nami
Za puno smo krivi sami

Drugdi išćen ja pravicu
S igrališćen čaj za dicu
Iza starog partizana
Tri su zida uzidana

Ljuljačke I tobogani
Čekat ote bolji dani
Ki tu va šću frulu sope
Čeka lova se z Evrope

6. Isplati se fondi čekat
Za ta "ogromni" projekat
Mili Bože daj me kljepi
Ja tuliko iman v žepi

Vesel san ča niman duga
I čaj prošla bela kuga
Bebi bum je va Bribiri
Dičji plač se selon širi

Dado Čor I Drago Krstić
Rinuli su dublje prstić
Mladenačko srce lupa
Samo sto let broje skupa

Neka uči čeljad mlaja
Kako triba praznit jaja
Ki na tuju ki na svoju
Jednuč ću i ja na moju

TAMBUR

SUDAC

Kamo ćeš ti stari vole
Ti se bojiš ženi gole
Ni kaj mlaja ili stara
Nisi nego za mežnjara

Poli nas se minja slika
Išču novog „NASLJEDNIKA“
Izbori su nan pred vrati
Stranki nude kandidati

Pravnici i direktori
I šoferi i dohtori
Imena se sašća melju
Tlić se ote za fotelju

Jednaj stranka dala gasa
Paj z rukava zvukla asa
Nij to šlager starogracki
E moj družu Beogracki

Vraća se va naše selo
I ovd se reče „belo“
Ne znan ki bi otel rada
„NASLJEDNIKA“ z Beograda

7. Dal pozna toj prednost pića
Vučića i Nikolića
S te stranke niko divani
Da on ima veli plani

Stipendirat da te dicu
Oprit opet „Viševicu“
Da bi ju preuzel sada
„Metal servis“ z Beograda

Prit će još tri kandidata
Na male i vele vrata
Saka stranka dat će svoga
Oćel narod znat za koga

Ćel pokazat da se more
Od lošega zibrat gore
Na kraji bin otel sinjat
Da moramo nič i minjat

Zač već dugo ljudi moji
Bribir koda ne postoji
A to jednuč triba prestat
Zač očemo z harti nestat

TAMBUR

ABUKAT

Dečki lipo piju bazak
Prvi njin je to izlazak
Pred njimi je velo delo
Obavit te sako selo

Kot i pastir svoje stado
Vodi je kapelnik Dado
Petnajst sel nan mesto broji
Tribij zdržat ljudi moji

Povidit se ovo mora
Lipi pozdrav iz Podgora
Ovoj jedna zгода pića
Pozdravljaju Požarića

U Joži nij ženska mlada
Brzoz prošla ća parada
Na telefon to smo čuli
Atmosfera ravna nuli

8. Da bu malo lipša slika
Va posjetu stiže Dika
Pajdašu gredu va dvor
Gutenberg I Velibor

Kate veli hote v kuću
Popit ćete kafu vruću
Joža želju ima dragu
Zasost ćemo nek gre k vragu

Za stolon dva dečka side
More bit je i ne vide
Toči Dika vino v čaši
Tujega nij si smo naši

Kapetan je Lepen totu
Čoč ti popit Dika sprout
Ivan šuti niš ne veli
Igra se na mobiteli

Dika nima municije
Pita ća nij kondicije
Skoči Lepen kot oparen
Dikaj ostal pak zavaren

V kući se ne čuje muha
Oplel gaj tu iza uha
Kot kad mesar tuće vola
Otresal gaj priko stola

Sega grla Lepen zija
To tij moja kondicija
Još sej sukal tu do pasa
Pa još malo dodal gasa

Da ne pukne opet koža
Brže se umiša Joža
Zija I rukami maši
Pa Lepena s kuće spraši

To su moji dragi gosti
Ma Ivanu još nij dosti
Još se jednuč kuću vrne
I Dikića opatrne

Veli Joža sadaj dosta
Naglodal si moga gosta
Kad parada kletu pride
Neću da te oće vide

9. A utorak na sastanki
Odboru su živci tanki
I parada cela smira
Da Lepena degradira

V jedan glas mu natovare
Mesto sablje vuć magare
Odlučilaj mularija
Bit će bolja kondicija

TAMBUR

SUDAC

V Rošći kuće nova sorta
Koda si va srid Resorta
Va turizam su se dali
Par bazeni uzidali

Urbane su vili gori
Tu gost voli da odmori
Za to će odrišit kesu
Najdel je na GPS-u

Lani san se trefil v seli
Auto mi blica veli
Tabelica muj Njemačka
Van zihaje lipa mačka

Halo postman guten tage
Ja imala ajne frage
Di haus od familija
Draj und cvancig Varelija

Od šuba mij jasna slika
Oni išću Ivu Kvika
Evuda uz Frica desno
Samo da ne bude tesno

Ženaj križi klala na se
Veli da nij šene štrase
Kako oće Bože gori
Tud ja jedva na motori

Pun je fale i Capelli
Za bukingi va ton seli
Savetuje Trišić Zori
Da skopa bazen va dvori

10. Dara ima plani čisti
Skuhat kotal za turisti
Da čeljad ne bude žedna
Cen euro litra jedna

TAMBUR

ABUKAT

Još spomenut ovdi vredi
Veli korak va privredi
Bribiri se minja slika
Nij zasluga „NASLJEDNIKA“

Dela se po celi dani
Na Kričini na pilani
Meine delo tamo pelja
Vlasnik je pilane Želja

Ki ga znadu jako malo
Reče mu se još Trapalo
Ne divanin to bez veze
Jačij neg pilana Breze

Ki još niste gori bili
Po celi dan krule pili
Mat Ivanka sused Mata
Dela se po 23 sata

Neda pak sidi na zidi
Kubicira se ča vidi
Takov se s diplomun rodi
Va toj firmi knjigi vodi

Razdelaju ondi vani
Dvajset metri v jednon dani
Suseda mij rekla Mica
Cena skoro pa sitnica

I nedilje da su radne
Dela se dok ko ne padne
Sačuvaj je Bože sveti
Na godišnji ote v leti

TAMBUR

11. **SUDAC**

Dvi tri su se još doznale
 Pozdravljale su se Štale
 Nij to lahko ljudi moji
 Sto dvajset kuć selo broji

Nij čajanki pa ne žure
 Oće dokli ne zaškure
 Sobun zimlju reć se mora
 Štentencije autora

Rakija muj lipo legla
 Dok Martina gaće pegla
 Muziki se drže male
 Oće š njimi v gornje Štale

Opisat ekipu moran
 Lepen, Igor I Mer Goran
 Dario I Svetić Deno
 I Grbićuj to sujeno

Muzikaj to lipa mala
 Sakoj kući zapivala
 Da domaćin žal ne bude
 Popiju se ča ponude

Svetić dostaj bil nagazil
 Maloj manje nase pazil
 Neće tu bit gredi veće
 Ma do kraja zdurat neće

Proteže se četa mića
 Se od Stevi do Carića
 Do Gordane I Zlatana
 Vlatku, Mili još za dana

Tamo pak je I garaža
 Skrilo sej niko od daža
 Kapetanska sablja viri
 Vitoj zaspal na krompiri

Kad su s kuće zišli mlaji
 Gredu I do Toni Baji
 Totu spaze alaj vera
 Lončarića Olivera

Ne znan čin gaj natakalo
 Ma gaj grdo zavezalo
 Povidela su nan dica
 Tatu mući kralježnica

Ovo nij od išijasa
 Manjaj tribal davat gasa
 Graševina vino belo
 Funkcije muj oduzelo

Ki su ga od tud odnesli
 I ženi na prag prnesli
 Oću skratit brže bolje
 Da nij bila baš od volje

Nosite to mrtvo telo
 Biserki va malo selo
 U matere neka nana
 Va konobi od Picana

Mi smo šli još toga dana
 Do Švrakića Marijana
 A tapkajuć po škurini
 Još do Braci I do Rini

Pol od naše grupe male
 Stigloj Rini na finale
 Još te litru pa nek dimi
 I Braca će lipo šnjimi

Lepen sej ničega sitil
 Paj na oko suzu hitil
 Ruli kot i da ga kolju
 Ča nimaš ku pismu bolju

Suzica mu suzu stiže
 Od vlagi se parket diže
 Va čudi ga gljeda Rina
 Ka muj pička materina

Još nij dosta Bože sveti
 Finili smo va bufeti
 Već nan vino telo koći
 A i sanak gre na oči

13. Oću morn is skrozi nabit
Doma još Martinu gladit
Ne na plećih ni trbuhi
Zaspal san va pladnji juhi

TAMBUR

ABUKAT

Sad prihaja vrime vruće
Za nje ča igraju buće
Oćel opet kot I lani
Utakmice igrat vani

Za jog našlo sej mestišće
Nogometno igrališće
Stadion će niknut novi
Za bućanje na Ćokovi

Ne znan ki tij plani risal
I dozvole kij napisal
Va dekreti tako stoji
Sej va rukah Benksa Voji

Već pol vika da ne pije
Sada skuplja donacije
Nikogare taj ne štedi
Bože da se ne uvredi

Redon pita direktori
Obrtnici i dohtori
Ki tokare ili oru
Isto pita da pomoru

Dohtor Vinko prišal z Puli
Na kafi ga Voja guli
Dok još nisi finil kuće
Jedna plaća gre za buće

Donira se se od reda
Od čelarih išće meda
Vinari dadu va vini
Penzići od mirovini

14. Da za jog bi bilo zgodno
Da grijanje ima podno
Povidelaj glava bistra
Vojuj tribi za ministra

Ki po gostijonah plaze
Biže doćin Voju spaze
Oćel pitat za tribinu
Ili samo članarinu

Soldih tribij cela graba
Općinska je pomoć slaba
Zato Voji skidan kapu
I stišćen mu desnu šapu

Da se čagod ne zasere
Kroz harti to prati Jere
Zna se kamo saka kuna
Vrića daj već napol puna

Mateo nadzira gradnju
I picu dobi na pladnju
V temeljih su puste mriži
Zač ta teren malo biži

Otel iskat se bulini
U Martinčić na Solini
Smiluj in se Bože sveti
Da ga fine vavon leti

Jel „NASLJEDNIK“ spekal torti
Za prvaka va ton sporti
Neka vavik zgaja puno
Prvak svita Kraljić Bruno

TAMBUR

SUDAC

Kad god hitin asa trefa
Pismaj tu od TBF-a
Pismaj stara isti divan
Zač ustaša zač partizan

15. Jel ded komu bil domobran
Pak si zato ratoboran
Ovoj samo pića slika
Hrvackaj to pulitika

Pa da stvari budu gore
Vidi čuda moj nebore
Žili bil je pustil Stipa
Vlast je otel do kraj vika

Sej to ljudi od obidi
Nij tu srama niti stidi
Precjedničku belu vilu
Jedva zeli su na silu

A za prošlost kaj žnjilela
Zadrhtalaj zemlja cela
Bivši šef od lipe naše
Dokopal sej vruće kaše

Starog trunka znete snimki
Bez cenzure i bez šminki
Veli Stipa Jasenovac
Više bil je ljetnikovac

Stari pozdrav još je biral
Šimunić je to citiral
Velebitska dobra vilo
Je li tebi prišlo milo

Komu oće ovo smetat
Po svitu se gren prošetat
Dobilaj i amerika
Lipo svoga „NASLJEDNIKA“

V šentenciju to san stavil
Zač sej prvo nami javil
Bil je stigal faks od Trampa
Da maknemo Milu Krampa

Ja gren sada maknut tebe
Da još ki god ne najebe
Sada zadnji dah udahni
I još jednuč ljuden mahni
(UDARAC SABLJUN)

OSTAVINA
16. **ABUKAT**

Nit je meda niti mlika
U našega “NASLJEDNIKA”
Nasljedil je jako malo
Ja gren čitat čaj ostalo

Za bribirski narod celi
Zadnjen svojen pismi želi
Za mačkare volji veće
Dom se sam napunit neće

Za Udrugu ovdi piše
Od Općini soldih više
Za badav in pusta volja
Kad muzikaj skupljaj bolja

Atoru s prve ruki
Novi zubi i dva kuki
Kuki novi od železa
I va gubicu proteza

Finili su ludi dani
I za mladi kapetani
Zadnji poklon je od njega
Pol lanjskoga godišnjega

Ostavil je Vitomiru
Staru knjigu o Bribiru
Da tendi besedi stare
Va Bribiri su MAČKARE

Kapetani nek duraju
Najmlaji su vavon kraju
Za Dadu pak kapelnika
Dundovića Mili slika

Ostale su nike želje
Za naše ugostitelje
Još četiri benda kletu
Po dva neka sopusu etu

17.

Antoniju daj to lazna
Napisana vela kazna
Kad god v Riki se nasere
Slikaju ga se kamere

Provodi se noćni nižu
Za sakin kuferti stižu
Ma ova ča žepa viri
Zarajenaj va Bribiri

Subotu sej bil našišal
Jedvaj z ovog doma zišal
Da ju zabi velaj šteta
Po curu gre do bufeta

Nij odovud strana roba
Na Graci je čeka soba
Čaj pak ona vase vlela
Daj š njin v auto posela

Povideloj niko doli
Da ga ona jako voli
Predigra to nij sramota
Počelaj još kraj kažota

Doznal san od mesopusta
Da gaj sprotu klala v usta
Po ustimi da ga melja
Već ov ne zna kamo pelja

Prvo brina majko sveta
Pa dvostruka pirueta
Bude se na Graci dica
Va papar je šla "Ibica"

Antonio van zihaje
V gaće spravlja livo jaje
Teče doma do te mere
Koda mu se jako sere

Dovukal sej do postilje
Zvoni maša od nedilje
Pijanoj zaleglo telo
Jel na njega to zvonelo

18.

Ljudi vani su na puti
Još je niko va auti
Saj stučena cura plava
Da ju jako boli glava

I eto ti pizdarija
Hitna kola I murija
Fleši, trubi I sireni
Se radi pijane beni

Za prekršaj kazna vela
Tri leta da za nju dela
Policija neće vagat
Još jednučka će polagat

A divojkaj bolje bila
Kad sej malo otreznila
Jedino se nij doznalo
Jel va ustih ča ostalo

TAMBUR

ABUKAT

Od evuda pa do Trsta
Si znadu kij Ive Krsta
Poznat će ga zemlja cela
Ulovil sej novog dela

Istinaj to ljudi živa
Va glumačke vodi pliva
Snimat će na RTL-i
I to ljubav je na seli

Snimit će se kadri ovi
Poli strica na Lukovi
Već su bili snimit malo
Jako njin sej tu dopalo

Fale novog kandidata
Estrada opira vrata
Lipo telo čvrsta guza
Da hita na Toma Kruza

19.

I da lipi govor ima
Samo neka projde zima
Na prolići kreću snimat
Sih nas oće to zanimat

Ne znadu TV-a vile
Čega su se ulovile
Daj lve za glavu viši
Ako vino pomiriši

Još kad v kuću pridu frajle
Ako mu popuste sajle
Nij to lve on od prija
Ovo bit će komedija

NASLJEDNIK muj bez pardona
Četiri kupil kurtona
Neka biraju glumice
Čel š njun il bez gumice

Prija neg je premijera
Sital sej i režisera
Dok Ivica bira ženi
Va škatuli praksiteni

NASLJEDNIK sej jedva predal
Bil bi rada to pogljedal
Zadnja želja ajme meni
Da se Ivica oženi

TAMBUR

SUDAC

Tratur i komadić čriva
Da se nafta ne preliava
Toj za Jolu i Rapaju
Pa da lakše pretakaju

Lahko smet sej tujoj brigi
Ja va žepi niman figi
Šentenciji ovdi piše
Da bin bil zel tri put više

20.

Za tokari opa bato
Šljemi ča koristi NATO
S kacigun je sigurije
Igrat buće kad se pije

V leti se za petran Boga
Uvik najdu u nikoga
Kad v želuci vino kuha
Bući lete okol uha

Faljen Isus i Marija
Mobitel je tu Nokija
Ostavina na papiri
Toj frizerki našoj Miri

Gre s postilje oganj snitit
Dvi treščice va peć hitit
Ko juj zvalo ne znan ni ja
Na mobitel Mira zija

Kašnje oću nazvat tebe
Gren naložit zač me zebe
Neće gorit bez papira
Pa novini zimlje Mira

Kad sej malo razgorelo
Kodaj grdo zasmrdele
Mobitel je šal s novini
Zija Mira po Rivini

Ne znan kaj to bila marka
Gori bolje od suharka
Dobro da nij šteti veće
Zač ju zadnje vrime neće

Par dan prija togaj bila
Krivo naftu natočila
Bilaj trezna ne va saftu
Va rezervar vlela naftu

Toj dimelo skidan kapu
Koda zibirali su Papu
Strošak novi toj milina
Do čepa nalet benzina

21.

Va penzijij niš ne dela
Paj to za nju šteta vela
Poć će da ki dinar zgrabi
Do Gordani frkat babi

TAMBUR

ABUKAT

Grbić Branko to mij rekal
Duješini sej zatekal
On i radna grupa cela
Uređuju naša sela

Kose, grabe, čagod spile
Kadi koren pusti žile
V zadatak su ta dan zeli
Duješin pokosit celi

Krenu redon mi se čini
Nišća roba na tribini
Kamoj Bože vrag odvukal
Onoga ki tu sej sukal

Gaće, maja i stomanja
I pulover od fuštanja
Jel šlo jebat, sasci misit
Ili sej ki šal obisit

Zad šmrikvice jedne krive
Opazil gaj mudri Ive
Moli Boga slikaj grda
Stolica muj valjda tvrda

Ki vrag vas ovamo void
Ja san evo na zahodi
Neka neka vele oni
Mi smo da si kupaoni

Lani v leti ne znan ni ja
Zlataj stukla audija
Od udarca mi se čini
Oprli su se kušini

22.

Druge šteti nij velike
Štosdenfer je od plastike
Popravit sej brzo dalo
Malo sej popituralo

Zračni jastuk va volani
Moraš imit zakon brani
Va miša si moreš svirat
Ali neć ga registrirat

Jastukon zatrdit školje
To košta ko sveto ulje
Mačkare su zadnje bile
Audija vozi Mile

Nismo s ovin još gotovi
Zač patrolaj na Čokovi
Gospodine budi miran
Auto nij registriran

Slušat nisu ga oteli
Tabelle su mu zneli
Mesopust je pomoć nudil
Dokli ov ga nij osudil

Paj šal pisat na brzinu
I klal to va ostavinu
Milej dobil šnjini I Braca
Dva črvljena lufmadraca

TAMBUR

ABUKAT

Zadnja želja stel to čuli
Ambulanta na vrh kuli
Do Olgine mi se čini
Koda premaloj školini

Samo zdravi do nje moru
Bolni I ne gredu zgoru
Si znate da to su šale
Za bolnoga nisu škale

23.

Sitil sej on I Potpleta
Pa mu šalje nova zeta
Ov put bil je jako brižan
Krabunosa šalje z Grižan

I lovcimi nič ostavlja
Puno blaga puno zdravlja
Kubik peska malo cigli
Da još jedan dom bi digli

Zač ov stari budi miran
Redovitoj prebukiran
Stat ću da me ne prehare
Sitnun sačmun ne nagare

Bože kakoj stisla zima
Pol naroda već drv nima
Već zdavni nij tako bilo
Da tuliko sej nitilo

Veli minus ove ture
A nij moglo ni bez bure
Paj sokrilo Sokolanu
I dva groba v iston danu

Lete krovi I grobnice
Poduljini prikolice
Povidit se ovo mora
Prikolicaj od Davora

Hitilo juj toga dana
Na ženina karavana
Bare gljeda svoje gajbi
Na auti već nij šajbi

Na groblji nij šteta mala
Buraj mrtvih sokrivala
Kodaj harta mramor leti
Križaju se ki su sveti

“NASLJEDNIK” je mislel nan je
Platil je osiguranje
Pa oće sanirat Braca
Tin se bavi firma z Graca

TAMBUR

24.

SUDAC

Pak za naši općinari
Ostavil je veli dari
Dva pravnika azilanti
Da delaju mesto Anti

Da prekinen sad tišinu
Antej šal va mirovinu
Ugovori, protokoli
Sej još na njegovon stoli

Čulo sej do Velog laza
Za dari od deda mraza
Općina sej za to bila
Malo preveć otrošila

Darivaju ljudi stari
Naši dragi općinari
Ali dari dobit nete
Mlaji od osandespete

Ovo pravin mor nis jarac
Moraš bit duboki starac
Da bi dobil Bože sveti
Malo slatka va paketi

Cikuladnaj tu pogača
Krvnu sliku da pojača
I sok ča se vodun miša
Od njega se lipše piša

Ljudi moji trošak veli
Šest je živih vavon seli
Još se pak i to doznalo
Da sej mrtvih darivalo

Poslušajte staru benu
Dar je bil za jednu ženu
Šentenciji tako piše
Već devet let ta ne diše

Provjeril san to mij delo
Pretresal san celo selo
Sad bin pital nis pretjeral
Kij pogaču njenu žeral

25.
Pravnik triba va općini
Spisak novi da načini
Samo san in dal na znanje
Za kletu paketić manje

TAMBUR

SUDAC

Skoro san ostal bez glasa
A zabil san glavnog asa
Nij ostala stara krama
Za Marinka Amsterdama

Jedan šator dobre marki
Da postavi ga va parki
Va svoj dvor da već ne more
Tamoj lanac moj nebore

Pismari san rekal Smilji
Da on nana poli Dilji
Snalazi se lupež stari
Apartman muj va pekari

Dilja ima srce velo
Zač je grdo zazimelo
Pad ok ona misi testo
Mark ima va čoški mesto

Tu zahrnje na katridi
Da ga Dilja okon vidi
Da i on ne krene misit
Zač će Đoko ga obisit

Čaj načinil Bože sveti
Dugo ga nij va bufeti
Povidela mij elita
Zapeloj okol kredita

Pital san još gradi dicu
Zač je pišal va pećicu
Od kad ovdi su mačkare
Nij ga vidit u Tamare

Nen povidit koga ljubi
Doručak je poli Zubi
Ako žepi jače srbi
Zaleti se i do Vrbi

26.
Zadnji obed daj bil pojl
Kad je Hajduk nič osvojil
Kako god zvučalo ludo
Medicinsko on je čudo

Niti kuha niti prži
Tekućina njega drži
Mesožder nij a ni vegan
Zauvik je samo žedan

TAMBUR

SUDAC

Ča da rečen još na kraji
A da zatende mlaji
Paradi će bit i kletu
Čitat će se opet etu

Ne damo utrnut ovo
Jutro gremo na Čokovo
Važgat ćemo "NASLJEDNIKA"
Kraj njegova spomenika

Prija negoj ća utekal
Nauho mij ovo rekal
Na Čokovo tamo skrozi
Antonio da ga vozi

Zadnja to muj bila želja
Da ga tamo on otpelja
Niš više od mesopusta
Gremo čagod hitit v usta

TAMBUR